

Ûe per ûe, Setéme que coussirabe au soum dous castagns la hoelhes biscaudades ou embrumades ; lous pupliès que-s aloungaben méy encoère, bergougous d'abé despulhat las loues arrames enta ha la catsère dou més d'Aoust. Més lous càssous puchants e las cassourres badibes ne-s lechaben pas enredi per las purmères aubes fresques de l'abor. Que berdeyaben d'û bert négre, pregoun, tilhous, qui nou fanera que debat la baysade empousouàde de la gibrade.

Lous arredalhs qu'èren à poc près arrecattats, e lous prats, oun tournabe créche l'èrbe tagnèque, desbesats per augan de la brouitière de las dalhuses, que poudèn escouta en pats la cansouï planeyante dous gritchs.

Û yoén cassadou, qui sourtibe dou bilàdye, que lechè lou camî en û cutour, e que sauté ûe barralhe qui apedassabe û plèch de broc. Lou fesilh debat l'eschère, que-s metou à segui lou bord d'û arrèc, en s'arrestan ta-s bouta à marcha tout doucetes, quon s'arrimabe d'ûe matuche de sègues ou d'aberous. Lous mèrlous menchidècs, bïste que lechaben d'espernica, e que courrèn en piulan, t'ana gaha la boulade, yùste de l'aute part de la bruchague, hore de la bïste dou cassadou enemïc. Û d'aquêts ausèts, qui-s debè créde, behide, méy abille que lous souïs frays, que parti per deça, en rasan las tires hoelhudes.

Lou fesilh que-s lhebè, tout d'û cop, dinqu'à l'espalle dou gouyat. Que-s alignè decap à la bestiote mau-escadénde, e lou cop que parti, mourdént. Lou praube auyàmi, las ales eschaquetades, n'anè pas hère loégn. Bïste, ûe mâ urchase qu'ou sauté dessus, qu'ou birouleyé de tout coustat, puch que l'enhounsè dehéns la poche de debat la bèste.